




山川典第一百卷


北固山部彙考

梁武帝所登之北固山

北固山在今江南鎮江府城北下臨長江其勢險固故名梁武帝嘗登此山北望又名北顧山



北固山圖



考

按南徐州記城西北有別嶺入江面臨水號云北固

按京口記北固山廻嶺入江懸水峻壁舊北固作固字梁高祖云作鎮作固城有其語然北望海口實爲壯觀以理而推宜改固爲顧望之顧輿地志云天景清明登之望見廣陵城如在青霄中

按方輿勝覽浙西路鎮江府北固山在州北一里廻嶺下臨長江其勢險固卽府治所據及甘露寺基建康寶錄梁武帝幸京口登北固樓遂改名北顧

按三才圖會北固山圖考北固山在京口城北下臨長江元和郡縣志謂其勢險固故名梁大同十年武帝嘗幸此山易名北顧山之岡有甘露寺門內稍右有鐵浮圖十級山上又有觀音殿殿前長江在目殿側巖下有秋月潭潭之右爲馬澗庭下有鐵鑊二山之巔爲多景樓金焦兩山東西相峙北下山足石室深可丈餘名觀音洞山之半爲真武祠鞠場有狼石蘇文忠公謂寺有石如羊相傳諸葛孔明坐其上與孫仲謀論曹公兵事鞠場之左有小水渟泓深碧名鳳凰池山南有天津泉按潛確類書匾字部北固山在鎮江府京口記云在潤州郡北一里下臨揚子江

按鎮江府志山川攷北固山在郡城一里郡治後郡南有長山者發自天目屏風三茅至銅坑東郤而來勢高延袤數里東行爲馬鞍迴龍諸山又迤邐而北至于釜鼎京峴京峴中抽而右折爲郡治郡之北特起此山三面臨江迴嶺斗絕勢最險固故名北固水經注所謂別嶺入江者也其內章一枝南向爲土山巖然隆起狀甚尊嚴晉唐以來郡治蒞焉則北固實郡城之後屏也晉謝安蔡謨皆于山上作庫以儲軍資是後頽壞山上猶有小亭登降甚狹梁武帝幸朱方樂平侯正義爲南徐州刺史乃廣其路旁施闌楯武帝悅登望久之改曰北顧山上有寺曰甘露西有五聖巖秋月潭宋嘉定中郡守史彌堅因山趾陂澤疏爲是潭以藏舟巖石間有舊刻秋月潭三字明太祖擒僞吳戴院判迴臨幸焉潭側有蝦蟆池石似蝦蟆形走馬澗傳云劉備溜馬處此中一小徑直達山巔兩壁夾峙中通一綫石峭立險澀明崇禎十二年知府程岫少贅治之澗東有海涵河其流俱入于江澗之上有橋曰柳溪西南有鳳凰池上有宋淮海書院趾明太祖嘗臨此池召見耆儒丁熙拱等有守法守業守誠之諭時有僧守型獻詩盧陵王臣詩云山雲欲到龍初起池水空清鳳未還又有鰻井天津泉試劍石狼石山後石壁廣數十丈峻峭險峙下臨江潭最高者名鐵柱峯一名

石帆觀音洞在石帆下石上題曰雲房風窟兩傍有甘露門跨鰲門俱史彌堅立甘露在北固亭之北跨鰲在南又有鐵塔雙麟塚甘露港甘露渡北固浦

北固山部藝文一

北固山賦

明盛恩

公子之與處士辨囿旣闢辭鋒迺厲各相誇詡倦而就憩北固山人於是揖而進曰二君之談樂乎蒙之竊聽久矣嘗聞齊楚競利而漢得以信其威吳蜀爭長而魏得以成其功敢申小子之末議以廁大人之高風公子固云失矣處士其亦未爲得乎夫太極肇判陰降陽升游氣紛擾有萬不同凝而爲山峙流而爲川融長江大河天限南北非以相感也喬嶽疊阜界晝邦圻非以相欺也辨方正位者以中土爲尊體國經野者以夷曠爲德今公子列爲西藩而佻天以乘人處士命之東土而露才以歎己皆不可以垂訓作則而適足以貽譏致辟也金焦之事又焉足道獨不聞北固之名山乎吾將語二子以主客之勢偏正之區江城之要會澤國之樞機邃古之初上帝命都錫之潤土以界楚主塹以長江互以喬嶽誰其尸之實惟天作西峙金山東偃焦峯左紆吾臂右引吾肱巍然北

固雄跨在中水陸之所輻輳四方之所具瞻陰陽之所委順風雨之所周旋日月之所毓秀雲霧之所蒸液珍怪之所化產瑰奇之所窟宅金精瑱其裏玉英琤其表駟蚌繆其趾梢雲冠其幪據坤靈之寶勢承蒼昊之殷純萃五德之變化含元氣之氤氲元醴湧騰於其麓甘露被宇而屢臻南臨鐵甕之郭北倚揚子之江西控龍蟠虎踞之都東引海門天蕩之鄉且其郡治直延巖宮傍翼神祠梵宇左起右伏闕梁隆跨塵市絡繹河隍委蛇開堰交植城堞百雉而連雲煙火萬井而在目者則星羅于其前也其沖融沆瀣渺瀾淡波如連山乍合乍散激潏激灑浮天無畔濤吼成雷湍激爲林崩雲屑雨詭色殊音舟人漁子徂險極深汨沒於龍鼉之窟挂罥於礁砦之岑者則帶紆於其後也其崇島巨壑崢嶸孤峯俯劈洪波仰指太清柳溪鰻井汨汨泠泠秋月之潭纖塵不凝鳳凰之池九苞英曲徑幽崖海嶽爭勝樓挹多景巖藏五聖走馬澗泓海涵河映偃孫吳之狼石紀梁武之別名則古今勝迹往往而在其朱闕穹窿梵宮高聳負陰抱陽前翼後擁高閣齊雲百級懸磴謬門曲榭斜阻原洫修廊廣廡連城堞形雲斐疊以翼極瞰日炯晃而耀室則勝院名菴不可殫述其稜稜劍氣赫赫鋒威弧矢聲轟驚塵橫飛牝牡驪黃騰連風逸旌旗蔽野閃雲爍日鉦鼓發而聞雷凱

歌旋而震谷則演武之場闢於其趾者也其銅鏞鐵鏤薛蝕苔侵容優百斛重踰千鈞浮圖鎔冶挂
日撐雲方竹之杖泥蠟之金古鐵擊之而清越斷碑疊之而峗崕則瑰奇名物藏于其中者也其靈
草冬秀神木叢榮巖峻崑崙金石崢嶸珊瑚碧樹周阿而生希萋萋之卉挺落落纖之長松蔓樛木
之修羅延萬藹之飛莖朱桂黝儵于南北紫芝阿那于西東梗楠蕙芷鬱鬱蓊蓊則林麗之饒于何
不有其長楊映沼芳枳編籬植以拒柳防以金隄梅杏郁棣葱蒨葦葦朱櫻碧蓼芹薺萊蕪諸葛之
菜張公之梨周文之棗房陵之李磊落繁英于其林負霜含露于其畦則園圃之毓實繁有叢其援
雌蜺吟鼯鼠夜叫寒熊振頤特慶昏影山禽晨鳴野雉朝雊虎豹豺兕鵬鴈鸞飛揚躍竄而邁馳
翩翩駉駉而駭跳則毛羽之羣草伏而木棲也其魴鯉魷鰕海若鯨魚元牛紫貝水豹蒼龜叔鮪王
鱣江豚海豨交躍縱橫振鱗奮翼洩洩淫淫駭神奪目中流噴薄而閃屍滄瀨蹉跎而失足則鱗介
之族晨游而夕泳也其皇與帝蹕霸主道君卿相之輻剌史之輪翰苑詞林之玉趾幽人空谷之足
音旅之瑣尾而落魄佔客失岐而問津則延頸繼踵其從如雲其宸翰綸音雄文妙墨雜煥斗星錯
置金玉或榜之楣或鏤之石秀章熠燿於碧丹鳥篆蚪蟠於朱綠則雨蝕塵蒙不可盡識若乃冬不

淒寒夏無燠炎均調中適四序便便法鼓琅以振響晨香馥以揚煙琴高之所靈矯王喬之所留連
釋子盤石而誦法方士餐朮以延年丈人抱甕而灌畦農父負壘以耕田蒙草塞谿人跡罕至風月
無邊丹青失技望之者適臨至止者忘去言有大而非誇事足徵而可據豈若孟浪之遊談無端之
虛譽也主人之言未卒金焦二客乃瞠然相顧睨然失色再拜致恭同聲而謝曰聞韶渚者然後知
鄮衛之淫汙覩無窮者然後悟井天之咫尺僕黨疎狂進退維谷而今而後庶幾有識主人亦莞爾
而笑油然而懌乃相與噉中治之茗酌甘露之醴飯新禽之禾烹長江之鯉歡然相得擊壤而各爲
之歌公子歌曰望帝都兮歲難屹中流兮巍巍駕金鼈兮駢駢鎮末方兮無隕處士歌曰吸滄溟兮
湯湯聳其瞻兮東方棲高士兮焦光名萬世兮洋洋主人歌曰江浩浩兮山峨峨瑩朔域兮潤之阿
振鴻濛兮撼鯨波

北固山賦

潘一桂

粵若稽天地之奇跡蒐流峙之靈區采登陟之近玩尋烟霞之靚墟維北固之明雋軼宇宙而稱殊
爾其欲兩儀以俶基參二嶼而分鼎展朱方以侑障殿潤浦而剪屏吐丹嶂于懸霄樹華闕于青冥

絕僊黨以孤出軋浮吹而遙騁于雲霄以秀上負日月而虧景畧厓巖以韞竇勢險固而延互爰自
鶴山拓脈龍嶺竊樊縈族蠟雲驤翠奔賓立于南抽而右旋從從僊僊駢駢蜿蜒如郭如廓爲輔
爲藩駭離奇散而不尊茲山鞏之崔嵬靜存乃若岷嶓長波荆揚寧瀆百川匯流沃沃蕩蕩颶風
秋揚桃汎春漲凶瀾暴雪烟龍駭浪決決既湊滔滔斯壯馮夷理轡靈胥乘王茫茫禹貢弱不能相
茲山砥之殺其潢漾故其苞吳孕越奠湘控漢則神臯之上扈焉隍江壙河蟠墮劫嶠則天塹之巖
阻焉其前則峻堞百雉危蜺萬井長防曲蜿采閣雄整戶衍人溢烟蒸霧泮山氣相鮮昕夕殊景風
結如波雲成似嶺又有長揚列陣細柳開營尺籍伍符曠弩抗旌懸戢植鍬用戢長鯨其後則重波
浩淵與空蒼然寂寞東邁逝而不還浮觀蜀岡出霧入烟灝渺無際羣象鏡懸乃有鼃鼃來嬉魚龍
所都鮫人卷綃淵客弄珠海狶夜拜水豹宵呼漁父榜人垂綸汰鱸其左則焦巖圖岫協靈通氣控
馬爲門披山作礪抗清引濁爭奇貢媚螺黛可拾熬極如帶其間遐阡矢界近陌臚分開寶引流溝
塍互輪桔槔不事潢潦爰臻遺秉滯穗滌場維勤其右則芙蓉貽佩浮玉標圖通川互經五土交輸
脈絡雄勝膏衍儲胥凌陸跨津環塗委紆乃有風鳴濤答鏗鉤漉豁海舶江舫楚檣越艤隨潮櫂槩

追霞命楫分風共駛交引逆折蛟蜃並流爭馳競捷彈靈之險千古所懾乃若稽其上巖則有梵宇
星臚瓊雲構臺飛梁垂景香臺切漢危亭簪乎木末巨門抗乎霞半廊鱗次以旋翼磴緣空而梯棧
樓絕鄰而多景閣懸居而駕岸揭軒廡之窈窕締簷栱之瓏璦煥金碧而光煜謝濁氣而塵斷于是
降覽壑背俯循巖陰鮮颿激響淩烟出林怒石昌目空寒股心爾其鬼崖桀壁負天奇出神明所扶
削成屹立競勢交峭苔駁霜剔奮若相勞齟若相惕濤文翠蒸冰裂斧劈幽洞沈寥空颺遙集與俗
分氣營魄載戢戢若夫榜懸梁日寺記吳年筇遺方竹鑲引青蓮浮圖范鐵天津吐泉鳳池濯月麟塚
橫烟贊皇捨宅海岳名巔皆茲山之遺事妙可得而稱言也若夫登薄躬以升降闔陳跡之所留殘
地脈于赭衣嗤秦政之東游就斯高之近禍爲山川之深仇覽策馬之餘塵尋狼石之舊趾奠漢鼎
于談笑寄雄心于鞭弭棲劍氣于礪礪儼伯跡之未徙慙晉元之一隅繭予幅以自隘恃地險于長
江置中原于度外雖灑新亭之泣莫軫橫流之慨拾遺音以延賞樂梁武之宣游駕翠翳以鱗萃紛
象奇而闡幽詠廢和之奇藻蕩妍韻于千秋戲青霓之盤姍參畫板之龍象披研山之靈阜忻裔流
之可仰雖筆墨之欲盡垂典型而在望嗟乎噫哉烟壑長封微音遐逝徙倚高風淒涼伯氣廣武興

悲牛山結涕傷廢興之倏忽怒波瀾之崎嶇若風露之停草曾不能以須臾諒金石之非固焉榮名之可愉凋春秋於哀樂積雲岫之唏噓曷若睨蓬壺以褰裳披方丈以濡足極浮觀之杳眇抗危梯以遐矚駐白日之豐暉連榮光于若木存元化之端倪翹鴻濛之杼軸原千變于微瞬齊高深於一掬流日月於龍嵒蜚駿賞於茲谷

遊北固山記

都穆

北固山在京口城北下臨長江元和郡縣志謂其勢險固故名梁史大同十年武帝嘗幸此山易名北顧予舊讀謝靈運遊山詩及世說所載荀令則登山望海云雖未覩三山使人有凌雲之意未嘗不嘆賞其勝癸丑之歲獲一遊焉同遊者謹呼飲酒不能徧覽窮搜竊用悔恨丁丑夏五月復至京口錢逸人德孚慫與予遊而坐雨數日庚子雨止時尚寶卿劉君克柔適至劉君予進士同年也聞予欲遊欣然治具遂與劉君及庠士唐和卿出城自山之岡而登里許至甘露寺寺之得名以創于吳甘露元年門榜曰天下第一江山宋延陵吳琚書蓋梁武帝舊嘗書此不存琚補之也門內稍右有鐵浮圖十級迺唐李德裕觀察浙西時所鑄奉舍利以資穆宗冥福後燬于火今之浮圖宋元豐

間鑄非復唐之舊矣劉君以所攜酒酌于觀音殿前長江在目茫無畔岸殿側崖下有秋月潭潭之
右爲馬澗其水已涸午寺僧飯客方丈庭下有鐵鑊二僧云梁武帝植蓮其中以供佛者登山之巔
多景樓僅存其址予癸丑之遊樓猶未燬嘗記把酒倚闌雲影墮江金焦兩山東西對峙如青螺列
銀盤中最爲奇觀今樓雖廢景猶昨也慨歎久之多景北下山足有石室深可丈餘名觀音洞崖峻
草滑人鮮得至和卿復要飲于真武祠祠在山之半飲畢予欲觀狼石僧識其處命之前導下山至
演武場而石在焉蘇文忠公詩序謂寺有石如羊相傳諸葛孔明坐其上與孫仲謀論曹公兵事今
此石絕不類羊而亦不在寺中予疑移于後人撼以數人不動視其下則石之生土中者豈蘇公作
詩時未之見耶演武之左有小水渟泓深碧名鳳凰池其上山石壁立可玩惜不移席于此隨行僧
言天津泉在山南麓鄰于僧室以下山不及觀聞洪武初高廟駐蹕山中見僧汲于江賦詩有甘露
生泉天降津之句僧後掘地得泉因以天語名之予惟斯遊之樂固昔之所無而況有同年同志如
劉君和卿則又非偶然者京口之山以金焦北固爲首人稱三山其勝槩誠天下之最也金焦予向
遊其間皆爲作記而復記斯遊幸亦大矣神僊渺茫又何必會此以求所謂三山者哉

遊北固山記

王思任

江南人北還入京口卽有家慶出則茫茫交集其興亡逝水之感每許困衡者知之而盱揚氣往之人不與焉則北固者登臨噫慨古今南北之所也金焦勝絕終有濤心北固枕鐵甕城如在茵几而豆瞰諸山予每讀盧肇詩海日生殘夜江春發舊年輒爲此山悲壯半晌庚戌十月量移由拳買櫻脯走眺三山閣劉伯純適至飛觥流覽不覺燈火照揚州矣下上橫斜星斗俱醉乃捉伯純之臂呵而問之銅坑東鄧京峴抽中何以撐突厥山改元甘露吳皓何以不固六化人何居行僧何往獬何獐豸豈僧繇輩之神物而爲鬼風蝕盡贊皇手柏何以干之天監寶書何以漫之胡石旣狼而騎之如獼謀瞞何語寄奴何闔四十九枚鱸魚何穴二十六峯研山安歸蘇仲恭之羣木何以今不顛據褐衣黃狗駕肩何出朱裳霜簡鐘鳴何走仙人咫尺一鶴可通豈秦漢之君而必當褰濡萬年何德何魚作人語而免其咎張祐摹勢山河盡來何徐凝惡詩而亦愕然得解伯純啞啞曰子無他不過渫憤舒憊之套吾安德變詐鏗出天問而地答之也予亦啞啞彷彿記有僧字慎獨者以白茗作供而予復至披雲軒寫舊時阿育王寺詩藏之此僧半室以江爲鏡古樹老簪撐持數萬得讀書坐臥此

中卽痿蹶不下山足矣予兄自天氏曰子見山卽癡去隨處捨身亦伯純所謂套也因命記之同遊者兩姪曰吉三曰緘三

京口三山志序

顧清

山之有志本禹貢山海經周禮職方氏而廣之宋范至能之桂山近代之石鍾皆是也北固金焦爲京口三名山其形勢之雄風物之美文人墨客之品題皆足以勝於天下而未有物之志如桂與石鍾者山之僧以是爲闕典也稍裒集其事各爲一編志於此濫觴矣然統紀末一篇帙舛訛間或失之蕃蕪溺於神怪而遺其大者亦有之平陽史宗道以名進士來爲其郡推官聽斷之暇覽而興焉乃謀諸郡人張君廷心彙而輯之合爲一書曰京口三山志旣成不遠數百里走書問屬爲是正而後乃付之梓人廷心舉於鄉與余爲同年史君博雅好古又余所習知也意不可以虛辱而三山者近在吾鄉邑間舟航南北今老矣追維平生非局於程期則累於憂患雖蹇鋒引領神爽飛越而巖蘿磴蘚之側猶未有一跡焉每披圖按牒未嘗不悵然興懷意奇觀勝賞亦必造物者有以予之而昔人所謂意行所謂臥遊者特巧於自遣而終非其本情也乃今因是編而得以盡窮其勝龍宮

塔廟之外至於林谷之杳邃泉石之幽奇崖鏤木刻之環瑋譎怪之跡莫不羅列並進舉集於目前而無一隱遯異時肩輿徑造不問主人而所至皆爲熟境頭陀元老諸公亦不以予爲生客也則二君之惠不旣多矣乎乃爲略詮次其後先考訂其疑闕定爲若干卷而述其大意以歸之史君名魯張君名榮宗道廷心其字余所從考實者北固山僧存景焦山僧智鉉始來致史君意者余同年友王君國儀終志事者新守羅君遵善也

三山志序

屠隆

余登三山然後悟天地靈秀瑰異跌宕之觀無盡而六合內外之變幻杳渺而莫可究詰者何量也夫茫茫元氣豁翫翕張而出之聚而成象名之曰天聚而成塊名之曰地又天地之氣結而爲山融而爲川川之大者是爲江海而江海之中又復有山東方朔神異經所傳蓬萊方丈瀛洲三山在大海中多珍禽異獸靈藥瑤草往往爲高情勝氣者所豔慕又相傳以爲巨鰲戴之橫波乘漲世罕得登幾於恍惚汗漫而所謂北固金焦三山者在潤州靈奇空闊庶幾大海三山之亞北固峙潤州北順臨長江沙岸若崩海門若畫業稱南徐巨觀而金焦兩山則屹然大江中流琳宮金剎矗其上而